

四庫全書

集部



欽定四庫全書

集部

唐詩紀事卷三十

九

詳校官監察御史臣沈孫璉

主事銜臣徐以坤覆勘

覆校官中書臣

呂雲棟

校對官原任典簿臣

郭祚熾

騰錄監生臣

劉紳



欽定四庫全書

唐詩紀事卷三十七

宋 計敏夫 撰

元微之

微之為御史奉使東川於褒城題黃明府詩其序云昔  
年曾於解縣飲酒余為觥錄事嘗於寶明府廳有一人  
至頻犯語令連飛十數觥不勝因逃去醒後問人前虞  
卿黃丞也此後絕不復知元和四年三月奉使東川十  
六日至褒城驛逡巡有黃明府見迎瞻其形容髭髯似



識問其前銜即曩日逃席黃丞也說向前事黃生惘然  
而悟因饋酒一罇艤舟請余同載余不違其意與之盡  
歡徧問褒陽山水則褒如所奔之城在其左諸葛所征  
之路次其右感今懷古作贈黃明府詩曰昔年曾痛飲  
黃令困飛觥席上當時走馬前今日迎依稀迷姓字積  
漸識平生故友身皆遠他鄉眼暫明便邀連榻坐兼共  
榜舡行酒思臨風亂霜稜拂地平不看深淺酌貪愴古  
今情迤邐七盤路坡陁數丈城花疑褒女笑棧息武侯



征一種埋幽石空聞千載名出本事詩

微之聞西蜀薛濤有辭辯及為監察使蜀以御史推鞠  
難得見焉嚴司空潛知其意每遣薛往洎登翰林以詩  
寄曰錦江滑膩峨眉秀幻出文君與薛濤言語巧偷鸚  
鵡舌文章分得鳳凰毛紛紛辭客多停筆箇箇君侯欲  
夢刀別後相思隔煙水菖蒲花發五雲高後廉問淞東  
乃有劉採春自淮甸而來容華莫比元贈詩曰新粧巧  
樣畫雙蛾謾裏常州透額羅正面偷勻光滑笏緩行輕



踏皺紋波言辭雅措風流足舉止低回秀媚多更有惱  
人腸斷處選詞能唱望夫歌望夫歌者即羅嘖之曲也  
元云在淝河七年因醉題東武其詩曰役役行人事紛  
紛碎簿書功夫兩衙盡留滯七年餘病痛梅天發親情  
海岬踈因循未歸得不是憶鱸魚盧侍郎簡求戲曰丞  
相雖不為鱸魚為好鏡湖春色耳謂採春也

公先娶京兆韋氏字蕙叢韋逝為詩悼之曰曾經滄海  
難為水除却巫山不是雲出本事傳



微之元和四年為御史鞠獄梓潼樂天昆仲送至城西  
而別後旬日昆仲與李侍郎建開遊曲江及慈恩寺飲  
酣作詩曰花時同醉破春愁醉折花枝作酒籌忽憶故  
人天際去計程今日到梁州後旬日得元書果以是日  
至褒仍寄詩曰夢見兄弟曲江頭也到慈恩院院遊驛  
吏喚人排馬去忽驚身在古梁州千里魂交合若符契  
自有感夢記備叙其事

微之以明經制策入仕其一篇自述曰延英引對碧衣



郎江硯宣毫各別床天子下簾親考試宮人手裏過茶  
湯是時貴族並應制科用為男子榮進

連昌宮辭云連昌宮中滿宮竹歲久無人森似束又有  
牆頭千葉桃風動落花紅蔌蔌宮邊老人為余泣小年  
選進因曾入上皇正在望僊樓太真同憑欄千立樓上  
樓前盡珠翠炫轉熒煌照天地歸來如夢復如癡何暇  
備言宮裡事初過寒食一百六店食無煙宮樹綠夜半  
高樓絃索鳴賀老琵琶定場屋力士傳呼覓念奴念奴



潛伴諸郎宿須臾覓得又連催特勅街中許燃燭春嬌  
滿眼睡紅消掠削雲鬟旋粧束飛上九天歌一聲二十  
五郎吹管逐逡巡大遍梁州徹色色龜茲轟陸續李暮  
壓笛傍宮牆偷得新翻數般曲平明大駕發行宮萬人  
鼓舞途中百官隊伍避岐薛楊氏諸姨車闌風明年  
十月東都破御路猶存祿山過驅令供頓不敢藏萬姓  
無聲淚潛墮兩京定後六七年却尋家舍行宮前莊園  
燒盡有枯井行宮門闌樹宛然爾後相傳六皇帝不到



離宮門久閉往來年少說長安玄武樓前華萼廢去年  
勅使因斫竹偶值門開暫相逐荆榛擲比塞池塘狐兔  
驕癡緣樹木舞榭歌傾基尚存文牕窈窕紗猶覆塵埋  
粉壁舊花鈿烏啄風箏碎珠玉上皇偏愛臨砌花依然  
御榻臨街斜蛇出驚巢盤闌拱菌生香桼正當衙寢殿  
相連端正樓太真梳洗樓上頭晨光未出簾影黑至今  
反掛珊瑚鉤指向傍人因慟哭却出宮門淚相續自從  
此後還閉門夜夜狐狸上門屋我聞此語心骨悲太平



誰致亂者誰翁言野父何分別耳聞眼見為君說姚崇  
宋璟作相公勸諫上皇言語切熨理陰陽未泰豐調和  
中外無兵戎長官清平太守好揀選皆言由相公開元  
欲末姚宋死朝廷漸漸由妃子祿山宮裏養作兒虢國  
門前關如市弄權宰相不記名依稀憶得楊與李廟謀  
顛倒四海搖五十年來作瘡痍今皇神聖丞相明詔書  
纔下吳蜀平官軍又取淮西賊此賊亦除天下寧年年  
耕種宮前道今年不遣子孫耕老翁此意深望幸努力



廟謀休用兵

穆宗時嬪御多誦微之歌宮中號為元才子後荆南監軍崔峻歸朝出微之連昌宮詞等百餘篇奏御穆宗大悅即日拜祠部郎中知制誥微之上令狐文公書云某始自御史府謫官於外十餘年矣閑誕無事遂用力於詩章日益月滋有詩千餘首其間感物寓意可備矇眊之風達者有之詞直氣麤罪戾是懼固不敢陳露於人惟盃酒充景間屢為小碎篇章以自吟暢然以為律體



卑下格力不揚苟無姿態則陷流俗常然欲得思深語  
近韻律調新屬對無差而風情自遠然而病未能也江  
湖間多有新進小生不知天下文有宗主妄相倣倣而  
又從而失之遂至有褊淺之調皆目為元和詩體某又  
與同門生白居易友善居易雅能為詩就中愛驅駕文  
字窮極聲韻或為千言或為五百言律詩以相投寄小  
生自審不能有以過之往往戲排舊韻別創新詞名為  
次韻蓋欲以難相挑耳江湖間為詩者或相倣倣或力



不足則至於顛倒語言重複首尾韻同意等不異於篇亦目為元和詩體而司文者考變異之由徃徃歸咎於其嘗以為雕蟲小事不足自明也

樂天在洛大和中微之拜左丞相自越過洛以二詩別樂天云君應恠我留連久我欲與君辭別難白頭徒侶漸稀少明日恐君無此歡又云自識君來三度別這回白盡老鬚鬚戀君不去君須會知得後迴相見無幾幾死於鄂樂天哭之曰始以詩交終以詩訣絃筆俱絕其



今日乎

屈指貞元舊朝事幾人同見大和春

感興句

兒歌楊柳葉

妾拂石榴花

句

遠路事無限相逢惟一言月色照榮辱

長安千萬門

達白公句

右張為取作主客圖

微之序言寄樂天云九歲學賦詩長者往往驚其可

恠年十五六粗識聲病時貞元十年已後德皇帝春

秋高理務因人最不欲文法吏生天下罪過外間節

將動十餘年不許相朝死於其地不易者十八九而



又將豪卒愎之處因喪負衆橫相賊殺告變絡繹使者迭窺旋以狀聞天子曰某色將某能遏亂亂衆寧附願為其師名為衆情其實逼詐因而可之者又十八九前置介倖因緣交授者亦十四五由是諸侯敢自為意有羅列兒孩以自固者有開導蠻夷以自重者甚者視一境如一室刑殺其下不啻六畜厚加剝奪名為進奉其實貢入之數百一焉京城之中停第邸店以由巷斷侯甸之內水陸腴沃以鄉里計其餘奴婢資財



生生之備稱是朝廷大臣以謹慎不言為朴雅以時進  
見者不過一二親信直臣議士徃徃抑塞禁省之間或  
繕完墮墜豪家大帥秉聲相扇延及老幼土木妖熾習  
俗不恠上不欲令有司備宮闈中小碎湏求徃徃持幣  
帛以易餅餌吏緣其端剽奪百貨勢不可禁僕時孩騃  
不慣聞見獨於書傳中初習理亂萌漸心體悸震若不  
可活思欲發之久矣適有人以陳子昂感遇詩相示吟  
翫激烈即日為寄思玄子詩二十首故鄭京兆於僕為



外諸父深賜憐獎因以所賦呈獻京兆翁深相駭異秘書少監王表在坐顧謂表曰使此兒五十不死其志義何如哉惜吾輩不見其成就因召諸子訓責泣下僕亦竊不自怠由是勇於為文又久之得杜甫詩數百首愛其浩蕩津涯處處臻到始病沈宋之不存寄興而訝子昂之未暇旁備矣不數年與詩人楊巨源友善日課為詩性復僻懶人事常有閑暇閑則有作識足下時有詩數百篇矣習慣性靈遂成病蔽每公私感憤道義激揚



朋友切磨古今成敗日月遷逝光景舒慘山川勝勢風雲景色當花對酒樂罷哀餘通滯屈伸悲歡合散至於疾恙其身悼懷昔遊凡所對遇有常者則欲賦詩又不幸年三十二時有罪譴弃今三十七矣三十六年間是丈夫心力壯時常在閑處無所役用性不近道未能淡然忘懷又復懶於他欲全盛之氣注射語言雜揉精粗遂成多文然亦未嘗繕寫適值河東李明府景儉在江陵時僻好僕詩章謂能為解欲得盡取觀覽僕因撰成



卷軸其中有旨意可觀而詞近古往者為古諷意亦可  
觀而流在樂府者為樂諷詞雖近古而止於吟寫情性  
者為古體詞實樂流而止於模象物色者為新題樂府  
聲勢沿順屬對穩切者為律詩仍以七言五言為兩體  
其中有稍存寄興與諷為流者為律諷不幸少有伉儷  
之悲撫存感往成數十詩取潘子悼亡為題又有以干  
教化者近昵婦人暈淡眉目綰約頭鬢衣服修廣之度  
及匹配色澤尤極恠艷因為艷詩百餘首詞有今古又



兩體自十六時至是元和七年矣有詩八百首色類相  
從共成十體凡二十卷自笑冗辭亦不復致之於行李  
昨來京師偶在箱篋及通行盡置足下僅亦有說僕聞  
上士立德其次立事不過立言凡人急位其次急利下  
急食僕天與不厚既乏全然之德命與不遇未遭可為  
之事性與不惠復無垂範之言兀兀狂癡行近四十徼  
名取位不過於第八品而冒憲已六七年授通之初有  
習通之熟者曰地濕墊卑褊人士稀少近歲荒札死亡



過半邑無吏市無貨百姓茹草木刺史以下計粒而食  
大有虎豹蛇虺之患小有蝮蝥浮塵蜘蛛之類皆能鑽  
啣肌膚使人瘡痂夏多陰靈秋為痢瘡地無醫巫藥石  
萬里病者有百死一生之慮夫何以僕之命不厚也如  
此智不足也又如此其所詣之憂險也又復如此則安  
能保持萬全與足下必復京輦以須他日立立事之  
驗耶但恐一旦與急食相扶而終使足下受天下有不  
如已之誚是用悉所為文留穢箱笥比夫格奕擣里之



戲猶曰愈於飽食僕所為又不愈於格奕擣里之戲乎  
昨行巴南道中又有詩五十一首文書中得七年已後  
所為向二百篇繁亂冗雜不復置之執事前所寄思玄  
子者小歲為文不能自足其意貴其起予之始且志京  
兆公見遇之由今亦寫為古諷之一移諸左右僕少時  
授吹噓之術於鄭先生病懶不就今在閑處思欲怡神  
保和以求其內異日亦不復費詞於無用之文矣省視  
之煩庶亦已於是乎



琵琶歌

寄管兒魚管鐵山此後並新題樂府

琵琶宮調八十一旋宮三調

彈不出玄宗偏許賀懷智段師此藝還相匹自後流傳

指撥袁崐嶮善才徒爾為鴻聲少得似雷吼

去聲纏絃不

敢彈羊皮人間奇事會相續但有卞和無有玉段師弟

子數十人李家管兒稱上足管兒不作供奉兒拋在東

都雙鬚絲逢人便請送盃盞看盡工夫人不知李家兄

弟皆愛酒我是酒徒為密友著作曾邀連夜宿中輟清

溪華新綠平明船在管兒行盡日聽彈無限曲曲名無



限知者鮮霓裳羽衣偏宛轉涼州大遍最毫嘈綠腰散  
序多寵撚我聞此曲深賞奇賞著奇處驚管兒管兒為  
我雙淚垂自彈此曲長長悲淚垂捍撥朱絃濕冰泉鳴  
咽流鶯澁因茲彈作雨霖鈴風雨蕭條鬼神泣一彈既  
罷又一彈珠幢夜靜風珊珊低徊慢弄闌山思坐對燕  
然秋月寒月寒一聲深殿磬驟彈曲破音繁併百萬金  
鈴旋去聲玉盤醉客滿船皆暫醒自茲聽後六七年管兒  
在洛我朝天游想慈恩杏園裡夢寐仁風花樹前去年



御史留東臺公私感促顏不開今春制獄正撩亂晝夜  
推囚心似灰暫輟歸時尋著作著作南園花拆萼胭脂  
耀眼桃正紅雪片滿溪梅已落是夕青春值三五花枝  
向月雲含吐著作施罇命管兒管兒久別今方覩管兒  
還為彈綠腰綠腰依舊聲迢迢猿鳴雪岫來三峽鶴唳  
晴空聞九霄逡巡彈得綠腰徹霜刀破竹無殘節幽關  
鷄軋胡鴈悲斷絃若騁層冰裂我為含淒歎奇絕許作  
是歌始終說藝奇思寡塵事多許來寒暑又經過如今



左降在閑處始為管兒歌此歌此歌寄管兒管兒憂爾  
衰爾衰之後繼者誰繼之無乃在鐵山鐵山已近曹穆  
間二善才性靈甚好功猶淺急處未得臻幽閑努力鐵山  
勤學取莫遣後來無所祖

何滿子歌

張胡南坐為唐有態作

何滿能歌能宛轉天寶年中世

稱罕嬰刑繫在囹圄間下調哀音歌憤懣梨園弟子奏  
玄宗一唱承恩羈網緩便將何滿為曲名御譜親題樂  
府纂魚家入內本領絕葉氏有年聲氣短自外徒煩記



得詞點拍纔成已夸誕我居湖外拜君侯正值灰飛仲  
春瑄廣宴江亭為我開紅粧遲日花枝暖此時有態踏  
華筵未吐芳詞貌夷坦翠蛾轉盼搖雀釵碧袖歌垂翻  
鸛卵定面凝眸一聲發雲停塵下何勞笑迢迢擊磬遠  
玲玲一一貫珠勻款款犯羽含商移調態留情度意拋  
絃管湘妃寶瑟水上來秦女玉蕭空外滿纏綿豐破最  
慇懃整頓衣裳事閑散水含遠溜咽還通鶯泥晚花啼  
漸嬾歛黛吞聲若自寬鄭袖見捐西子浣陰山鳴鴈曉



斷行巫峽哀猿夜呼伴古者諸侯饗外賓鹿鳴三奏陳  
圭瓚何如有態一曲終牙籌記令紅螺盞

五絃彈云趙璧五絃彈徵調徵聲巉絕何清峭辭雄皓  
鶴警言露啼失子哀猿統林嘯風入春松正凌亂鴛令曉  
舌憐驕妙嗚嗚暗溜咽冰泉殺殺霜刀澁寒鞘促節頻  
催漸繁撥珠幢斗絕金鈴掉千鞞鳴鏑發胡弓萬片清  
球擊虞廟衆樂雖同第一部德宗皇帝常偏召旬休節  
假暫歸來一聲狂殺長安少主第侯家最難見接蘇雷



歌按曲皆承詔水晶簾外散貴嬪瑤瑁筵心伴中要臣  
有五賢非此絃或在拘囚或屠釣一賢得進勝累百兩  
賢得進同周邵三賢仕漢滅暴強四賢鎮岳寧邊徼五  
賢並用調五常五常既序三光曜趙璧五絃非此賢九  
九何勞設庭燎

放言五首云近來逢酒便高歌醉舞詩狂漸欲魔五斗  
解醒猶恨少十分飛蓋未嫌多眼前讎敵都休問身外  
功名一任他死是等閑生也得擬將何事奈吾何



莫將心事厭長沙雲到何方不是家酒熟鋪糟學漁父  
飯來開口似神鷄竹枝待鳳千莖直柳樹迎風一向斜  
揔被天公沾雨露等頭成長盡生涯

霆轟電烜數聲頻不奈狂夫不藉身縱使被雷燒作燼  
寧殊埋骨颺為塵得成蝴蝶尋花樹儻化江魚掉錦鱗  
必若乖龍在諸處何須警動自來人

安得心源處處安何勞終日望林巒玉英惟向火中冷  
蓮葉元來水上乾甯戚飯牛圖底事陸通歌鳳也無端



孫登不語啓期樂各自當情各自歡

三十年來世上行也曾狂走趨浮名兩迴左降湏知命  
數度登朝何處榮我杯中松葉滿遮渠肘上柳枝生  
他時定葬燒缸地賣與人家得酒盛

和樂天過秘閣書省舊廳云聞君西省重徘徊秘閣書  
房次第開壁記欲題三漏合吏人驚問十年來經排蠹  
簡憐初校芸長陳根識舊栽司馬見詩心最苦滿身蚊  
虻笑煙埃



和樂天贈楊秘書云昔與楊郎在帝城搜天幹地覓詩  
情曾因並句甘稱小不為論年便喚兄刮骨直穿由苦  
闢夢腸翻出暫閑行因君投贈還相和老去那能競底  
名

琵琶云學語胡兒撼玉鈴甘州破裏最星星使君自恨  
常多事不得工夫夜夜聽

內狀詩寄楊白二員外

時知制誥

天門暗闢玉鐙鉤晝送中

樞曉禁清彤管內人書細膩金奩御印篆分明衝街不



避將軍令跋勅兼題宰相名南省郎中誰待詔與君將  
向世間行

酬樂天餘思不盡加為六韻之作律呂同聲我愛身文

章君是一伶倫衆推賈誼為才子帝喜相如作侍臣

樂天

先有秦中吟及百節判皆為書肆書賈題其卷云白才子文章及樂天知制誥詞云覽其詞賦喜與相如並處

一次韻千言曾報答

樂天曾寄予千字律詩數首予皆用本韻酬和後來遂以成風耳

直詞三道共經綸

樂天與予同應制科並求前輩切直詞策以盡經邦之術其事已具之字

詩注元詩駁雜真難辯

後輩好偽作予詩傳流諸處身到會稽以有人寫宮詞百篇及



雜詩兩卷皆云是余所撰  
及手勘驗無一篇是者  
白樸流傳用轉新  
樂天於翰林中書取

書詔批答詞等撰為程式禁中號曰白樸  
每有新入學士求訪寶重過於六典也  
蔡女圖書雖

在口  
蔡琰口誦家書四百餘篇  
于公問  
戶豈生塵  
樂天嘗贈予詩云詩心如肺石動必達窮

民東川八十家冤憤一言申因  
感無兒之嘆故余自有此句  
商瞿未老猶希冀莫把

羸金便付人

寄湖西李大府四首云柳眼梅心漸欲春  
白頭西望憶何人  
金陵太守曾相伴共踏銀臺一路塵

藥珠深處少人知  
網索西臨太液池  
浴殿曉聞天語後



步廊騎馬笑相隨

網索在太液上學士候對歇於此

禁林同直話交情無夜無曾不到明最憶西樓人靜後

玉晨鐘磬兩三聲

玉晨觀在紫宸殿後面也

由來鵬化便圖南浙右雖雄我未甘早渡西江好歸去

莫拋舟楫滯春潭

微之善紀事如臺中鞠獄贈周兄詩云開裝轡頭綳靜

拭腰帶班鷄子繡線鞦狗兒金油

去聲

鐶又坐卧摩錦褥

捧擁綬絲腰罰俸西歸詩邀我上華筵橫頭坐賓位那



知我年少深解酒中事能唱犯聲歌偏精變籌義含詞  
徙殘拍促舞遞繁吹叫噪擲投盤生獐攝觥使寄吳士  
矩云予時最年少專務酒中職未解媿生獐偏矜任狂  
直曲庇桃根盞橫講捎雲式亂布闌分朋惟新間讒慝  
耻作最先吐羞言未朝食酬東川季相公云晉附赤霄  
羽葳蕤遊紫垣鬪班香案上奏語玉宸尊酬白學士云  
並入紅蘭署偏親白玉規又鬪班雲洶湧開扇雉參差  
又麪梨通蒂朽無味火米帶芒炊不精芽笋錢筒束鰕魚箭



羽鬢又病賽烏稱鬼巫占瓦代龜

南人賽烏鬼

紀懷贈李六

云昔冠諸生首初因三道徵公卿碧墀會名姓白麻稱

答胡靈之云矮馬駝長韃聲莽牛獸面纓一船席外語

三槓拍心精傳蓋加分數橫波擲目成華奴歌浙浙蓋

媚子侮卿卿又環坐唯更草投盤漸廢觥又柳愛凌寒

軟梅憐上番驚又雨催魚火焰風引去竹枝聲店卧戲

呈諸公籌筋隨宜放投盤止罰唯紅娘留醉打舞引紅娘拋打

曲觥使及醒差酒中觥使席上古職又搶旗如在手籌筋色目那復敢



歲褰酬樂天東南行云科試銓衡局衙參典校厨

書判同年

校正月月中分桂樹天上識菖蒲又白麻雲色膩墨詔電

光祖又祖竹聚新筍孫枝壓舊梧又酬樂天待漏入閣

云未勘銀臺契先挑浴殿關沃心因特召承旨絕常班

承旨在上颺閃才人袖官官傳詔嘔鵝軟輦鑲宮花低作帳雲

從積成山密視樞機草偷瞻咫尺顏恩垂天語近對久

漏聲閑丹陛曾同立金鑾恨獨攀

樂天舍人  
徽之翰林

筆無鴻業

潤袍愧紫文殷河水通天上瀛洲接世間謫仙名籍在



何不重來還神麴酒云七月調神麴三春釀綠醺雕鐫  
荆王盞烘透內邱瓶戴光弓詩云潞府筋角勁戴光因  
合成閑吟云晻淡州煙白籬節日脚紅江喧過雲雨船  
泊打頭風底子收魚市鴉兒噪荻叢不堪堤上立滿眼  
是蚊蚋狂醉云崑亭今日顛狂醉舞引紅娘亂打人亞  
枝紅云平陽池上亞枝紅桃花平在池上悵望山郵是事同還  
向萬莖深竹裡一枝渾卧碧流中

微之在鄂州周復為從事常命酬唱復簪笏見微之曰



某偶以大人往還獲一第其實不能詩賦微之曰質實如是賢於能詩遠矣

一云微之守浙東樂天守蘇其臺榭簡唱和內一聯云有月多同賞無杯不共持兩地暗合



唐詩紀事卷三十七



欽定四庫全書

唐詩紀事卷三十八

宋 計敏夫 撰

白居易

張為以居易為廣大教化主取其讀史詩云含沙射人  
影雖病人不知巧言誣人罪至死人不疑掇蜂殺愛子  
掩鼻戮寵姬弘恭陷蕭望趙高謀李斯陰德既必報陽  
禍豈虛施人事雖可罔天道終難欺明即有刑辟幽即  
有神祇苟免勿私喜鬼得而誅之又取秦中吟云厚地



植桑麻所用濟生民生民理布帛所求活一身身外充  
征賦上以奉君親國家定兩稅本意在憂人厥初防其  
淫明勅内外臣稅外加一物皆以枉法論奈何歲月久  
貪吏得因循役我以求寵歛求無冬春織絹未盈疋繰  
絲未盈斤里胥迫我納不許暫逡巡歲暮天地閉陰風  
生破村夜深煙火盡霰雪白紛紛幼者形不蔽老者體  
無溫悲喘與寒氣併入鼻頭辛昨日輸殘稅因窺官庫  
門繒帛如山積絲絮如雲屯號為羨餘物隨日獻至尊



奪我身上暖買爾眼前恩進入瓊林庫歲久化為塵又  
取寓意云豫章生深山七年而後知挺高二百尺本末  
皆十圍天子建明堂此材獨中規匠人執斤墨採度將  
有期孟冬草木枯烈火燎于陂狂風吹猛焰從根燒到  
枝養培二十年方成棟樑姿一朝為灰燼柯葉無子遺  
地雖生爾材天不與爾時不如糞上芝猶有人掇之已  
矣勿重陳重陳令人悲勿悲焚燒苦但悲採用遲又取  
赫赫京內史奕奕中書郎昨傳徵拜日恩私碩殊常貂



冠水蒼玉紫綬黃金章佩服身未暖已聞竄炎荒親戚  
不得別吞聲泣路旁賓客亦已散門前雀羅張富貴來  
未久倏如瓦溝霜權勢言尤速瞥若石火光不如守貧  
賤貧賤可久長傳語宦遊子且來歸故鄉又取得意減  
別恨半酣還遠程之句又人吏留不得直入故山雲之  
句又長生不似無生理休向青山學鍊丹之句又白髮  
鑷不盡根在愁腸中之句又與薛濤云峨眉山市勢接雲  
霓欲逐劉郎北路迷若似剡中容易到春風猶隔武陵



溪

已上皆  
主客圖

序洛詩序云序洛詩樂天自叙在洛之樂也予歷覽古

今歌詩自風騷之後蘇李以還

李陵蘇武  
為五言詩

次及鮑謝徒

迄于李杜輩其間詞人聞知者累百詩章流傳者鉅萬  
觀其所自多因讒寃逐征戍行旅凍餒病老存歿別  
離情發於中文形於外故憤憂怨傷之作通計今十八  
九焉世所謂文士多數奇詩人尤命薄於斯見矣又知  
理安之世少離亂之時多亦明矣予不佞喜文嗜詩自



幼及老著詩數千首以其多矣故章句在人口姓字落  
詩流雖才不逮古人然所作不啻數千首作一數奇命  
薄之士亦有餘矣今壽過耳順幸無病苦官至三品免  
罹飢寒此一樂也大和二年詔受刑部侍郎明年就領  
河南尹事又三年病免歸履道里第再受賓客分司自  
三年春至八年夏至洛凡五周年作詩四百三十二首  
除喪明哭子十數篇外其他皆寄懷於酒或取意於琴  
閑適有餘酣樂不暇苦詞無一字憂歎無一聲豈牽強



所能致耶蓋亦發中而形外耳斯樂也實本之於省分  
知足濟之以家給身閑文之以觴詠絃歌飾之以山水  
風月此而不適何往而適哉茲又以重吾樂也予嘗云  
治世之音安以樂閑居之詩泰以適苟非理世安得閑  
居故集洛詩別為序引不獨記東都履道里有閑居泰  
適之叟亦欲知皇唐大和歲有理世安樂之音集而序  
之以候夫採詩者甲寅歲七月十日云爾

元微之長慶集序云憲宗皇帝冊召天下士樂天對詔



稱旨又登甲科未幾入翰林掌制誥比上書言得失因為賀雨詩秦中吟等數十章指言天下事時人比之風騷焉予始與樂天同校秘書前後多以詩章尤長者始張十八古樂府李二十新歌行盧揚一裕書律詩竇七元八絕句博取精掇編而次之號元白往還詩集衆君子得擬議於此者莫不踴躍欣喜以為盛事嗟乎言未終而足下左轉不數月而僕又繼行心期索然何日成就又可為之歎息又僕嘗語足下凡人為文私於自是



不忍於割截或失於繁多其間妍媸益又自惑必待交  
友有公鑒無姑息者討論而削奪之然後繁簡當不得  
其中矣況僕與足下為文尤患其多已尚病之況他人  
乎今且各纂詩筆粗為卷第待與足下相見日各出所  
有終前志焉又不知相遇是何年相見在何地溘然而  
至則如之何微之微之知我心哉潯陽臘月江風苦寒  
歲暮鮮懽夜長無睡引筆鋪紙悄然燈前有念則書言  
無次第勿以繁雜為倦且以代一夕之話也微之微之



知我心哉

唐詩紀事卷三十八



欽定四庫全書

唐詩紀事卷三十九

宋 計敏夫 撰

白居易

韋式

崔玄亮

牛僧孺

李紳

沈傳師

盧羣

劉禹錫

封孟紳

陳潤

白居易

按樂天生於代宗大歷七年壬子

正月二十日

大和七年樂

天尹河南元日對酒詩云今朝吳興洛相憶一欣然夢得



君知否俱過本命年又詩云何事同生壬子歲老於崔  
相及劉郎序云余注云余與蘇州劉郎中同生壬子歲  
今年六十三退之生於大厯三年戊申微之生於德宗建  
中元年庚申卒於大和五年時年五十三少樂天八歲  
德宗貞元十六年己卯中書舍人高郢下及第第四人  
省試性習相近遠賦玉水記方流詩時年二十八樂天  
送侯權秀才序云貞元十五年予與侯生俱為宣城守  
所貢明年春予中春官第

傳云年二十七李商  
隱銘云年二十六



十七年庚辰試中書判拔萃補校書郎樂天泛渭賦序

云右丞相高公之掌貢舉也予以鄉貢進士舉及第左

丞相鄭公

珣瑜

之領選部也予以書判拔萃選登科十九

年天子並命二公對掌鈞軸

軸是年齊抗罷崔墀薨二公入相

憲宗元和

元年丙戌四月以賢良方正對策一等冬十二月尉鰲

屋為集賢校理賦長恨歌于鰲屋是月召入翰林為學

士遷左拾遺

元和二年為拾遺

樂天曲江感秋詩云元和二年

秋我年三十七長慶二年秋我年五十一序云元和二



年三年四年子每歲有曲江感秋詩是時子為左拾遺翰林學士

賀雨詩元和三年冬作

諷諭樂府詞元和四年作

凡九千二百五十言分為五十首

秦中吟等

詩皆拾遺時拾遺歲滿當遷憲宗聽自擇官樂天請如姜公輔以學士兼京兆戶曹叅軍以便親養詔可

五年以母喪解還有渭上等詩洎效陶淵明詩十六首七年拜左贊善大夫居昭國里酬張十八訪宿云昔我



為近臣君常稀到門今我官職冷唯君來往頻又寄元  
八云進入閣前拜退就廊下食歸來昭國里人卧馬歇  
鞍却坐至日午起坐心浩然又十年贈杓直云巳年四  
十四又為五品官蓋為贊善大夫首尾四年

十年秋或言居易母墮井死賦新井詩出為刺史王涯  
言其不可乃貶江州司馬

論盜殺武元衡事宰  
相嫌其出位故也

樂天東南行一百韻其間云博望移門籍潯陽佐郡符  
注云十年春微之移佐通州其年秋予出佐潯陽十一



年秋賦琵琶行時年四十五矣詩云行年四十五兩鬢  
半蒼蒼清瘦詩成癖粗豪酒放狂老來尤委命安處即  
為鄉或擬廬山下來春結草堂

十二年裴度平淮西

十三年冬移刺忠州三遊洞庭序云平淮西之明年冬  
予自江州司馬授忠州刺史微之自通州司馬授虢州  
長史又明年春各祗命之郡與知退偕行三月十一日  
參會於夷陵又賦詩云澧水店頭春盡日送君馬上謫



通川夷陵峽口明月夜此處逢君是偶然一別五年方  
見面相携三宿未回舡是也

十五年正月德宗崩穆宗立召為司馬員外郎是年寒  
食夜詩云四十九年身老日一百五夜月明天抱膝思  
量何事在癡男騷女喚鞦韆又初除尚書郎脫刺史緋  
詩云頭白喜拋黃草峽眼明驚拆紫泥書便留朱紱還  
銓閣却着青袍侍玉除是歲下峽自商山路還朝有商  
山路詩云萬里路長在六年身始歸所經多舊館大半



主人非

自十年至是六年矣

明年除主客郎中知制誥

長慶元年

以詩贈王十一李七元

九王舍人云紫垣曹局聯華地白鬢郎官老醜時莫怪

不如君氣味此中來按十年遲

時元微之亦以中人之薦入為舍人

是年

除中書舍人有絲綸閣下文章靜等詩

長慶二年七月自舍人勾外出守杭州

時河北復亂謀趙國急樂天論

事不合乃勾外遷

次藍溪詩云既居可言地願助朝廷理伏閣

三上章竢愚不稱旨聖人存大體優貸容不死鳳詔停



舍人魚書除刺史

長慶三年二月五日杭州花下作云二月五日花如雪

五十二人頭似霜聞有酒時須笑樂不關身事莫思量

長慶四年以太子左庶子分司東都

是歲正月穆宗崩恭宗立

三年

為刺史無政在人口唯向郡城中題詩千餘首慙為甘

棠詠豈有思人不三年為刺史飲冰復食蘗唯向天竺

山取得兩片石此祇有千金無乃傷清白

三月作錢塘湖石記時猶

在杭州則分司當在秋時洛中詩云五年職翰林四年蒞潯陽一年



巴郡守半年南宮郎二年直綸閣三年刺史堂凡此十五載有詩千餘章

寶歷元年三月餘守蘇州是年七月有吳郡詩石記明

年病免

華嚴經社石記云寶歷二年九月二十五日前蘇州刺史曰白居易記是歲十二月恭帝崩文

立宗

樂天欲去郡有自詠五章其一云官舍非我廬官園非我樹洛中有小宅渭上有別墅既無婚嫁累幸有歸休處歸去誠已遲猶勝不歸去又宿滎陽詩云生長在滎



陽少小辭鄉曲迢迢四十載復到滎陽宿去時年十二

今年五十六

時文宗大和元年也

文宗大和元年以秘書監召十月上旬誕聖之日樂天以秘書監與沙門義林道士楊洪元發問酬難是歲遷刑部侍郎徵之於浙東就拜尚書樂天詩云我為憲部入南宮君作尚書鎮浙東老去一時成白首別來七度換春風是也

二年歲暮詠懷云窮冬月末兩三日半百年過六七時



龍尾趨朝無氣力牛頭叅道有心期榮華外物終湏悟  
老病傍人豈得知猶被妻兒教漸退莫求致仕且分司  
時二李黨事興樂天畏禍求退故詠懷云人間禍福愚  
難料世上風波老不禁萬一差池似前事又應追悔不  
抽簪

二年春移病還東都是年夏得請為太子賓客分司

池見

上篇序自是  
不出東吳矣

將至東都先寄令狐留守云東都添箇狂

賓客先報壺觴風月知歸履道宅詩云徃時多暫住今



日是長歸

自是劉白令狐  
裴相唱和甚多

四年作自嘲詩云五十八翁方有後靜思堪喜亦堪嗟  
自後何處難忘酒不如來飲酒詩篇皆東都作也

五年拜河南尹樂天詩云六十河南尹前途足可知老  
應無處避病不與人期是年六十矣

七年復以賓客分司

序洛詩云大和二年詔授刑部侍郎明年病免歸洛旋  
以賓客分司居二年就領河南尹事又三年病免歸履



道里第再授賓客分司

開成元年起為同州刺史不拜改太子少傅

二年三月河南尹李待價禊於洛濱啓留守裴令公公  
召居易劉禹錫等一十五人宴舟中樂天賦三月草萋  
萋黃鸝歌又啼之作

四年賦病中詩序云開元己未歲余蒲柳之年六十有  
八冬十月甲寅始得風痺之疾因成十五首題為病中  
詩且貽所知無用自廣



五年春盡獨吟云病共樂天相伴住春隨樊素一時歸  
是年文宗崩武宗立樂天妓樊素也善歌楊柳枝人多以曲名名  
之樂天病去之夢得詩云春盡絮飛留不得隨風好去  
落誰家

辛酉會昌元年年七十以刑部尚書致仕

達哉樂天行云分司東都十三年七旬纔滿冠已掛又  
香山寫真贊序云會昌二年罷太子少傅為白衣居士  
寫真香山寺藏經堂又初致仕贈留守牛丞相時年七



十一則樂天七十致仕矣致仕詩云南北東西無所羈  
掛冠自在勝分司探花嘗酒多先到拜表行香盡不知  
炮笋烹魚飽殮後擁袍枕臂醉眠時報君一語君應笑  
兼亦無心羨保釐又醉中吟一生耽酒客五度棄官人  
注云蘇州刑侍河南尹同州刺史太子少傅皆以病免

五年為東都九老會時年七十四

六年八月薨東都贈右僕射時年七十五樂天寄王起  
李紳詩云云予與山南王僕射淮南李僕射仕歷五朝



年踰三紀海內年輩今唯三人故詩云故交海內只三人  
人二坐崑廊一卧雲時會昌六年也微之卒於大和六  
年明年崔元亮卒會昌二年劉夢得卒樂天之卒最  
後

韋式

樂天分司東洛朝賢悉會興化亭送別酒酣各請一字  
至七字詩以題為韻

王起賦花詩云 花點綴分葩 露初裛月未斜



一枝曲水千樹山家

戲蝶未成夢嬌鶯語更誇

既見東園成徑何殊西子同車

漸覺風飄輕似雪能

令醉者亂如麻

李紳賦月詩云

月光輝皎潔

耀乾坤靜空闊

圓滿中秋翫爭詩哲

玉兔竊難穿挂枝人共折

萬象照乃無私瓊臺豈遮君謁

抱琴對彈別鶴聲不

得知音聲不切

令狐楚賦山詩云

山聳峻回環

滄海上白雲間



商老深尋謝公遠攀 古巖泉滴滴幽谷鳥關關  
樹島西連隴塞猿聲南徹荆蠻 世人只向簪裾老芳  
草空餘麋鹿閑

元微之賦茶詩云 茶香葉嫩芽 慕詩客愛僧家  
碾雕白玉羅織紅紗 銚煎黃蘗色碗轉麴塵花

夜後邀陪明月晨前命對朝霞 洗盡古今人不倦將  
知醉亂豈堪誇

魏扶賦愁詩云 愁迫野深秋 生枕上起眉頭



閨閣危坐風塵遠遊 已猿啼不住谷水咽還流

送客泊舫入浦思鄉望月登樓 煙波早晚長羈旅絃  
管終年樂五侯

韋式郎中賦竹詩云 竹臨池似玉 裛露靜和煙綠  
抱節寧改貞心自來 渭曲偏種多王家看不足

仙仗正驚龍化美實當隨鳳熟 唯愁吹作別離聲回  
首駕騷舞陣速

張籍司業賦花詩云 花落早開賒 對酒客興詩家



能迴游騎每駐行車 宛宛清風起茸茸麗日斜  
且願相留懽洽惟愁虛棄光華 明年攀折知不遠對  
此誰能更嘆嗟

范堯佐道士賦書字詩云 書憑鴈寄魚 出王屋入  
匡廬 文生益智道著清虛 葛洪一萬卷惠子五車  
餘 銀鈎屈曲索靜題橋司馬相如 別後莫睽千里  
信數封緘送到閑居

居易賦詩字詩云 詩綺美瓌奇 明月夜落花時



能助懽笑亦傷別離 調清金石怨吟苦鬼神悲

天下只應我愛世間惟有君知 自從都尉別蘇句便

到司空送白辭

崔元亮

元亮為散騎常侍後以太子賓客分司東都歸洛和樂

天詩云病餘歸到洛陽頭拭目開眉見白侯鳳詔恐君

今歲去龍門欠我舊時遊自到未遊龍門幾人樽下同歌詠數

盞燈前共獻酬相對憶劉劉在遠寒宵耿耿夢長洲夢得



詩云幾年侍從作朝臣却向青雲索得身朝士忽為方外士主人仍是眼中人

元亮在洛與白樂天相從醉吟之樂曾有詩云共相呼喚醉歸來樂天答云居士忘荃默默坐先生枕麴昏昏睡早晚相從入醉鄉醉鄉此去無多地

元亮字晦叔礪州人大和中為諫議大夫鄭注誣宋申錫捕逮倉卒內外震駭元亮率諫官叩延英苦諫帝感悟由是名重朝廷頃之移疾歸東都召為虢州刺史卒元亮與元微之白樂天皆貞元初同年生也元亮名最



後自詠云人間不會雲間事應笑蓬萊最後仙後白刺  
杭州元為浙東廉使刺越而崔刺湖州白以詩戲之曰  
越國封疆吞碧海杭城樓閣入青天吳興卑小君應屈  
為是蓬萊最後仙三郡有唱和詩謂之三州唱和集  
樂天誌元亮墓云公晚年師六祖以無相為心地易簣  
之夕大怖將至如入三昧恬然自安於遺疏之末手筆  
題云暫榮暫悴石敲火即空即色眼生花許時為客今  
歸去大歷元年是我家諸子中蜀言罕言登進士第



元微之酬歌舒少府寄同年科第云前年科第偏年少  
未解知羞最愛狂九陌爭馳好鞍馬八人同看綠衣裳  
注云同年科第宏詞呂二吳王十一起拔萃白二十二  
居易平判李十一復禮呂四頻歌舒大垣崔十一八元  
亮逮不肖八人皆奉榮養

元亮在湖州寄三癖詩劉夢得言癖在詩與琴酒夢得  
和之并序云柳吳興亭臯隴首之句王融書之白團扇  
故夢得詩曰視事畫屏中自稱三癖翁管絃汎春渚旌



旆拂晴虹酒對青山月琴韻白蘋風會書團扇上知君  
文字工

牛僧孺

樂天夢得有除夜詩僧孺和云惜歲歲今盡少年應不  
知淒涼數流輩歡喜見孫兒暗減一身力潛添滿鬢絲  
莫愁花笑老花自幾多時

元和三年宣政殿試賢良方正能直言極諫科十人  
登科其後僧孺李宗閔王起賈餗四人皆相次拜相先



是白居易在翰林為考校官後僧孺罷相出鎮揚州居  
易在洛中有詩送云北闕至東京風光十六程坐移丞  
相閣春入武陵城紅旆擁雙節白髮無一莖萬人開路  
看百吏立班迎閫外君彌重樽前我亦榮何須身自得  
將相是門生

公始至京致琴書灞漣間先以所業謁韓文公皇甫員  
外二公披卷卷首有說樂一章未閱其詞遽曰且以拍  
板為什麼對曰樂句二公相顧大喜曰斯高文必矣公



因謀所居二公良久曰可於客戶坊稅一廟院公如所  
教二公復誨之曰某日可遊青龍寺薄暮而歸二公其  
日聯鑣至彼因大書其門曰韓愈皇甫湜同謁幾官先  
輩不遇翌日輦轂名士咸往觀焉奇章之名由是赫然矣  
或云僧孺登第與同輩登政事堂宰相曰掃廳奉候

樂天在香山時僧孺在廣陵有詩曰唯羨東都白居易  
年年香積問禪師樂天答云支許徒思遊白日夔龍未  
放下青天應湏且為蒼生住猶去懸車十四年

時僧孺  
年五十



七

樂天求箏於維揚僧孺先有詩曰但愁封寄去魔物或  
驚禪樂天云曾教魔女弄不動是禪心樂天云思黯自  
誇前後服鍾乳三千兩而歌舞之妓甚多乃謔予衰老  
故答思黯詩云鍾乳三千兩金釵十二行如他心似火  
欺我鬢如霜慰老資歌笑銷愁仰酒漿眼看狂不得狂  
得且須狂奇章又有詩云不是道公狂不得恨公逢我  
不教狂



公赴舉之秋嘗投贄於劉補闕禹錫對客展卷飛筆塗  
竄其文歷二十餘歲劉轉汝州公鎮海南枉道駐旌信  
宿酒酣賦詩劉方悟往年改公文卷僧孺詩曰粉署為  
郎四十春今來名輩更無人休論世上昇沉事且闔樽  
前見在身珠玉會應成咳唾山川猶覺露精神莫嫌恃  
酒輕言語曾把文章謁後塵禹錫和云昔年曾忝漢朝  
臣晚歲空餘老病身初見相如成賦日後為丞相掃門  
人追思往事咨嗟久幸喜清光笑語頻猶有當時舊冠



劍待公三日拂埃塵牛公吟和詩前意稍解曰三日之

事何敢當焉

宰相三朝後主印可以昇降百司也

於是移宴竟夕方整前

驅也劉乃戒其子咸及承雍曰吾成人之志豈料為非  
汝輩進修守中為上

僧孺周秦行紀云余貞元中舉進士落第歸宛葉間至  
伊闕南道鳴臯山下將宿大安民舍會暮不至更十餘  
里一道甚異夜月始出忽聞有異香因而進行不知狀  
遠見火明意為莊家更驅至一宅庭門若富家有黃衣



人曰郎君何氏何至余曰僧孺姓牛應進士落第往大安民舍誤道來此黃衣人告少時出曰請郎君入拜殿下簾下語曰妾漢文帝母薄太后此是妾廟太后遣軸簾使上殿召坐食頃太后命高祖戚夫人元帝王嬙余皆拜乃亦就坐太后迎唐朝太真楊妃齊潘妃余拜既命饌太后問曰今天子誰余對曰今皇帝名适代宗長子太后曰沈婆兒作天子也大奇命酒各賦詩余應教作詩曰香風引上大羅天月地花宮拜洞仙具道人間



惆悵事不知今夕是何年太后曰秀才遠來今日誰伴  
戚夫人先起辭曰如意成長潘妃曰東昏侯誓不負他  
綠珠曰石衛尉嚴忌太后曰太真今朝先帝貴妃重言  
其他太后目王昭君昭君不對低眉羞恨俄歸休餘為  
左右送入昭君院旦侍人告起太后戚夫人昭君等皆  
泣別使朱衣人送至大安民里余衣上香經十餘年不  
歇云云

李紳



紳初以古風求知於呂溫溫見齊煦誦其憫農詩曰春  
種一粒粟秋收萬顆子四海無閑田農夫猶餓死鋤禾  
日當午汗滴禾下土誰知盤中飧粒粒皆辛苦又曰此  
人必為卿相果如其言

奉酬樂天立秋日有懷見寄云深夜星漢靜秋風初報  
涼簟堦淅瀝響露葉參差光冰兔半升魄銅壺微滴長  
薄帷乍飄卷襟帶輕搖揚北除覓夢清斜月滿軒房展  
履步前楹劒戟森在行重城宵正分號鼓互相望獨坐



有所思夫君鸞鳳章天津落星河一葦安可航龍泉白  
玉首魚服黃金裝報國未知效維鵜徒在梁徘徊顧戎  
旃顥氣生東方衰葉滿欄草班毛盈鏡霜羸牛未脫轅  
老馬強騰驤吟君白雪唱慙愧巴人腸

樂天贈紳詩云一篇長恨有風情十首秦吟近正聲剛  
被老元偷格律苦教短李復歌行注云元九徃江陵余  
以詩一軸贈行自是格變李二十嘗自負歌行近見余  
樂府五十首默然心伏樂天藏書東都聖善寺號白氏



文集紳有詩以美之云寄玉蓮花藏絨珠貝葉扁院閑  
容容讀講倦許僧聽部列雕金榜題名刻石銘永添鴻  
寶集莫雜小乘經

紳字公垂中書令敬玄曾孫號短李穆宗召為翰林學  
士與李德裕元微之同時號三俊武宗時為相居位四  
年出鎮南卒

紳江南暮春寄家云洛陽城見迎梅雪魚口橋逢送雪  
梅劍外寺前芳草合鏡湖亭上野花開江鴻斷續翻雲



去海燕差池拂水迴料得心知近寒食潛聽喜鵲望歸來

開成間紳集其詩為追昔遊蓋嘆逝感時發於悽恨而作也或長句或五言或雜言或歌或吟或樂府齊梁不一其辭乃由牽思所屬爾赴梁漢歸諫垣升翰苑感恩遇歌帝京風物遭讒邪播越歷荆楚涉湘沅逾嶺嶠抵荒陬止高安移九江泛五湖過鍾陵沂荆江守滁陽轉壽春改賓客留洛陽歷會稽過梅里遭讒邪再為賓客



分務歸東周擢川守鎮大梁詞有所懷興生於怨故或

隱或顯不常其言真知音於異而已南梁行云江城鬱

鬱春草長悠悠漢水浮清光雜英飛盡空畫景綠楊重

陰官舍靜此時醉客縱橫書公言可薦承明廬

元和十年蒙

故山南節度僕射崔公奏觀察判官蒙以書見委常戲拙速青天詔下寵光至頒籍

金閨徵石渠

是歲五月蒙恩除左拾遺

秭歸山路煙嵐隔山木幽深

晚花折澗底紅光奪火燃搖風扇毒愁行客

駱谷中多毒木名山

琵琶其花明艷而與杜鵑花相雜樵者識之言內草木殺人杜鵑啼咽花亦殷聲悲



絕艷連空山斜陽瞥影淺深木雲雨翻迷崑谷間山雞  
錦質矜毛羽透竹穿蘿命儔侶喬木幽谿上下同雄雌  
不惑飛棲處望秦峯迥過商顏浪疊波堆萬簇山行盡  
杳冥青嶂外九重鐘漏紫霄間元和列侍明光殿諫草  
初焚市朝變北闕超臣半隙塵南梁吟嘯皆飛霰追思  
感歎却昏迷霜鬢愁吟到曉雞故篋歲深開斷簡秋堂  
月曉掩遺桂嗚嗚曉角霞輝粲撫劒長楹一長歎芻狗  
無由學聖賢空持感激終昏旦



憶春日太液池東亭候對云宮鶯曉報瑞煙開三島靈  
禽拂水迴橋轉綠虹當綺殿檻浮花鷁近蓬萊草承步  
輦王孫長桃艷仙顏阿母栽簪筆此時方侍從却思金  
馬笑鄒枚

憶夜直金鑾奉詔承旨詩云月當銀漢玉繩低深聽簫  
韶碧落齊門壓紫垣高綺樹閣連青鎖近丹梯墨宣外  
渥催飛詔草定新恩促換題明日獨歸花路近可怜人  
世隔雲泥



過荆門詩云荆江水闊煙波轉荆門路遠山蔥蒨帆勢  
侵雲滅又明山程背日昏還見青青麥隴啼飛鷗寂寞  
野徑棠梨花行行駟馬萬里遠漸入煙嵐危棧賒林中  
有鳥飛幽谷月上千峯一聲哭腸斷思歸不可聞人言  
恨魄來巴蜀我聽此鳥祝我冤魂死莫學聲嘶冤縱為  
羽族莫棲息直上青雲呼帝閭此時山月如銜鏡崑樹  
參差互輝映皎潔深看入澗泉分明細見樵人逕陰森  
鬼廟當郵亭雞豚日宰聞膾腥愚夫禍福自迷惑魍魎



憑何通百靈日低山晚問行客已酹椒漿拜荒陌惆悵  
忠直徒自持誰登山頭望夫石

涉沅湘詩云屈原死處瀟湘陰滄浪淼淼雲沉沉蛟龍  
長怒虎長嘯山水條條波浪深煙橫日落驚鴻起山映  
雲霞綠千里鴻呌離離入莫天霞消漠漠深雲水水虛  
江暗揚波濤鼃鼃動盪風騷騷行人愁望待明月星漢  
沉浮魅鬼號屈原爾為懷忠沒水府通天化靈物何不  
駢雷擊電除姦邪空作沈泉抱冤骨舉盃瀝酒召爾魂



月影滉漾開乾坤波白水黑山隱見汨羅之上遙昏昏  
風帆候晚看五兩戍鼓夔夔遠山響潮滿江津猿鳥啼  
荆夫楚語飛蠻漿瀟湘島浦無人居風驚水暗惟鮫魚  
行來擊棹獨長歎問爾精魂何所如

悲善才詩余守郡日有客遊者善彈琵琶聞其所傳乃  
善才所授項在內庭日別承恩顧賜宴曲江勅善才等  
二十人備樂自余經播遷善才已沒因追感前事為悲  
善才



穆王夜幸蓬池曲金鑾殿門高秉燭東頭弟子曹善才  
琵琶請奏新翻曲翠娥列坐層城女笙歌參差齊笑語  
天顏靜聽朱絃彈衆樂寂然無敢舉銜花金鳳當承撥  
轉腕攏絃促揮霍抹花翻鳳天上來徘徊滿殿飛春雪  
抽絃度曲新聲發金鈴玉佩相瑳切流鶯子母飛上林  
仙鶴雌雄唳明月此時奉詔侍金鑾別殿承恩許召看  
三月曲江春草綠九霄天樂下雲端紫綳供奉前屈膝  
盡彈妙曲當春日寒泉注射隴水開胡鴈翻飛朔天沒



日曛塵暗車馬散為惜新聲有餘歎明年冠劍閉橋山  
萬里孤臣投海畔籠禽鍛翮尚迴飛白首生從五嶺歸  
聞道善才成朽骨空餘弟子奉宣徽南譙寂寞三春晚  
有客彈絃獨悽怨靜聽深奏楚月光憶惜初聞曲江宴  
心悲不覺淚闌干更為調絃反復彈秋吹動搖神女佩  
月珠敲擊水精盤自怜淮海同泥滓恨魄凝心未能死  
惆悵追懷萬事空雍門感慨徒為爾

憶過潤州時元和二年余以進士為鎮海軍書奏從事



秋七月兵亂余以不從書奏飛檄之詐遭庶人李暴怒  
腰領不殊者再三後軍平尚書李公欲具事以聞余以  
本乃誓節非欲求榮罷所奏詩云昔年從官干戈地黃  
綬青春一魯儒弓犯控絃招武族劒當抽匣問狂夫帛  
書投筆封魚腹元髮衝冠捋虎鬚談笑謝金何所貴不  
為偷買用兵符

元微之和樂天東南行云李多嘲螻蛄竇數集蜘蛛注  
云李二十多詠物之作竇七頗改官衙屢有蜘蛛之喜



樂天詩曰悶勸迂辛酉閑吟短李詩迂辛辛邱度也

度之子一日自云辛氏子來見紳曰小子每憶白二十丈詩悶勸疇昔酒閑吟二十丈詩紳笑曰辛大有此狂兒吾敢不存舊

沈傳師

子詢

傳師次潭州酬唐侍御姚員外遊道林嶽麓寺題示云承明年老輒自論訖得湘守東南奔為聞楚國富山水青嶂邈逸僧家園含香珥筆皆眷舊白謙抑自忘臺省尊



不令執簡候亭館直許携手遊山樊忽驚列岫曉來逼  
朔雪洗盡煙嵐昏碧波迴嶼三山轉丹檻繚郭千艘屯  
華鑣蹀躞絢沙步大旆綵錯輝松門膠枝競驚龍蛇勢折  
幹不滅風霆痕相重古殿倚崑腹別引新徑縈雲根目  
傷平楚虞帝魂情多思遠聊開樽危絃細管逐歌颺盡  
鼓繡靴隨節翻鏘金七言凌老杜入木八法蟠高軒嗟  
余潦倒久不知忍復感激諭元元

傳師字子言既濟之子材行有餘權德輿門生七十人



推為顏子終吏侍

子詢字誠之亦能文咸通中為昭義節度使詢清粹端  
美神仙中人也制除山北節旄京城咸誦曹唐遊仙詩  
贈之云玉詔新除沈侍郎便分茅土領東方不知今夜  
遊何處侍從皆騎白鳳凰

李德裕觀察浙西有招隱山觀玉藥花詩云玉藥天中  
樹金閨昔共窺落英閑舞雪密葉作低帷

內署沈大夫  
所居閣前有

此花落空中回旋久之方集庭  
砌大夫草詔之暇常邀余同玩  
舊賞煙霄遠前歡歲月



移今來想顏色還似憶瓊枝

傳師和云曾對金鑾直同依玉樹陰雪英飛舞近煙葉  
動搖深素萼年年密衰容日日侵勞君想華髮僅欲不  
勝簪

盧羣

唐淮西節度使吳少誠不奉詔令羣使蔡州詰之羣諭  
以君臣之分忠順之義少誠乃從命羣又與唱和賦詩  
自言以反側常蒙隔在恩外羣於筵中醉而歌曰祥瑞



不在鳳凰麒麟太平須得邊將忠臣衛霍真誠奉主貌  
虎十萬一身江河潛注息浪蠻貊款塞無塵但得百寮  
師長肝膽不用三軍羅綺金銀少誠大悅羣以奉使稱  
旨遷祕書監羣字載初范陽人終於義成軍節度使

劉禹錫

三鄉驛伏覩明皇望女兒山詩斐然有感云開元天子  
萬事足惟惜當時光景促三鄉陌上望仙山歸作霓裳  
羽衣曲仙花從此在瑤池三清八景相追隨天上忽乘



白雲去世間惟有秋風辭

長慶中元微之夢得韋楚客同會樂天舍論南朝興廢  
各賦金陵懷古詩劉滿引一盃飲已即成曰王濬樓舫  
下益州金陵王氣黯然收千尋鐵鎖沉江底一片降幡  
出石頭人世幾回傷往事山形依舊枕寒流而今四海  
為家日故壘蕭蕭蘆荻秋白公賢詩曰四人探驪龍子  
先獲珠所餘鱗爪何用耶於是罷唱

詩弔張曲江曰聖言貴忠恕至道重觀身法在何所恨



色傷斯為仁良時難久恃陰謫豈無因寂寞韶陽廟魂  
歸不見人

元和十年自朗州召至京戲贈看花君子云紫陌紅塵  
拂面來無人不道看花回元都觀裏桃千樹盡是劉郎  
去後栽

再遊元都觀絕句并序云余貞元二十一年為屯田員  
外郎時此觀未有花是歲出牧連州貶朗州司馬居十  
年召至京師人人皆言有道士手植仙桃滿觀如紅霞



遂有前篇以志一時之事旋又出牧今十有四年復為  
主客郎中重遊元都蕩然無復一樹唯兔葵燕麥動搖  
春風耳因再題二十八字以俟後遊時大和二年三月  
也詩云百畝庭中半是苔桃花落盡菜花開種桃道士  
歸何處前度劉郎今獨來

禹錫嘗對賓友每吟張博士籍詩云新酒欲開期好客  
衣冠暫脫見閑身對花木則吟王右丞詩云興闌啼鳥  
換坐久落花多白二十二好余秋水詠云東屯滄海闊



南濱洞庭寬余自知不及韋蘓州春潮帶雨晚來急野  
渡無人舟自橫嘗過洞庭雖為一篇思杜員外落句云  
年去年來洞庭上白蘋愁殺白頭人鄙夫之言有愧於  
杜公也楊茂卿校書過華山詩曰河勢崑崙遠山形函  
蓄秋此實為佳句

贈歌人米嘉榮詩云唱得梁州意外聲舊人唯有米嘉  
榮近來年少輕前輩好染髭鬚事後生

禹錫赴吳臺揚州大司馬杜公鴻漸開宴命妓侍酒禹



錫詩曰高髻雲鬟宮樣粧春風一曲杜韋娘司空見慣  
渾閑事斷盡蘓州刺史腸

白樂天任杭州刺史携數妓還洛陽後却還錢塘故禹  
錫戲答云無那錢塘蘓小小憶君淚點石榴裙沈存中  
曰禹錫霓裳羽衣曲云三鄉陌上望仙山歸作霓裳羽  
衣曲又王建詩云聽風聽雨作霓裳樂天詩注云開元  
中西涼府節度使楊敬述造鄭愚津陽門詩注云葉法  
善嘗引上入月宮聞仙樂及上歸但記其半遂於笛中



寫之會西涼府都督楊敬述進婆羅門曲與其聲調相  
符遂以月中新聞為散序用敬述所進為其腔而名霓  
裳羽衣曲說各不同今蒲州逍遙樓楣上有唐人橫書  
類梵字相傳是霓裳譜字訓不通莫知是非或謂今燕  
部有獻仙音曲乃其遺聲然霓裳本謂之道調法曲今  
獻仙音乃小石調耳未知孰是

山圍故國周遭在潮打空城寂寞迴淮水東邊舊時月  
夜深還過女墻來樂天掉頭苦吟嘆賞良久曰石頭詩



云潮打空城寂寞回吾知後之詩人不復措辭矣

禹錫金陵

五題自叙云

禹錫與樂天唱和號劉白唱和集與裴度唱和號汝洛集與令狐楚唱和號彭陽唱和集與李德裕唱和號吳蜀集

禹錫字夢得附叔文擢度支員外郎人不敢斥其名號二王劉柳憲宗立禹錫貶連州未至斥朗州司馬作竹枝詞武元衡初不為宗元所喜自中丞下除右庶子及



是執政禹錫久落魄乃作問大鈞謫九年等賦又叙張  
九齡事為詩感諷權要久之召還宰相欲任南省郎乃  
作元都觀看花君子詩當路不喜出為播州易連州徙  
夔州由和州刺史入為主客郎中復作遊元都觀詩有  
免葵驚麥之語聞者益薄其行俄分司東都裴度薦為  
集賢學士度罷出刺蘓州徙汝同二州會昌時檢校禮  
部尚書卒

禹錫晚年與白傅友善詩筆文章時無在其右者常與



禹錫唱和往來因集其詩而序之曰彭城劉夢得詩豪者也其鋒森然少敢當者予不量力徃徃犯之夫合應者聲同交爭者力敵一徃一復欲罷不能由是每制一篇先於視草視竟則興作興作則文成一二年來日尋筆研同和贈答不覺滋多大和三年春已前帑墨所存者凡一百三十八首其餘乘興仗醉卒然口號者不在此數因而命小姪龜兒編勒成兩軸仍寫二本一付龜兒一授夢得小男崑郎各令收載附兩家文集予頃與



元微之唱和頗多或在人口嘗戲微之云僕與足下二  
十年來為文友詩敵幸也亦不幸也吟詠情性播揚名  
聲其適遺形其樂忘老幸也然江南士女語才子者多  
云元白以子之故僕不得獨步於吳越間此亦不幸也  
今垂老復遇夢得非重不幸耶夢得文之神妙莫先於  
詩若妙與神則吾豈敢如夢得雪裏高山頭白早海中  
仙果子生遲沉舟側畔千帆過病樹前頭萬木春之句  
類真謂神妙矣在在處處應有靈物護持豈兩家子弟



祕藏而已其為名流許與如此

故國思如此若為天外心

寄白公句

湖上收宿雨

句故人日

已遠窓下塵滿琴坐對一樽酒恨多無力斟幕踈螢色

迥露重月華深萬境與羣籟此時情豈任

無題

禪思何妨

在玉琴真僧不見聽時心秋堂境寂夜方半雲去蒼梧

湘水深聽琴

右張為取作主客圖

夢得曰柳八駁韓十八平淮西碑文左飡右粥何如我



平淮西雅云仰父俯子韓碑無有帽子使我為之便說  
用兵伐叛矣夢得曰韓碑抑雅余詩為云城中晨雞喔  
喔鳴城中鼓角聲和平美愬之入蔡城也須臾之間賊  
無覺者又落句云始於元和十二載四海重見昇平時  
以見平淮之年云

禹錫叙董健文集云詩其文章之蘊耶義得而言喪故  
微而難能境生於象外故精而寡和千里之謬不容秋  
毫非有的然之姿可使戶曉必俟知者然後鼓行於時



自建安距永明以還詞人比肩唱和相發有以朔風零  
雨高視天下雖蟬噪鳥鳴蔚在吏策國朝因之粲然復  
興由篇章以躋貴仕者相踵而起

封孟紳

行不由徑詩云欲速意何成康莊欲砥平天衢皆利往  
吾道泰方行不復由荒徑無由見蔣生三條遵廣達九  
軌尚安貞紫陌悠悠去芳塵步步清澹臺千載後公正  
有遺名



孟紳貞元十五年高郢下進士第一人終於太常卿

陳潤

賦得浦外虹云日影化為虹  
彎彎出浦東一條微雨後  
五色片雲中輪勢隨天度  
橋形跨海通還將飲水處  
持送使車雄

送駱徵君云野人膺辟命  
溪上掩柴扉黃卷猶將去  
青山豈更歸馬留苔蘚迹  
人脫薜蘿衣他日相思處  
天邊望少微




東都所居寒食下作云江南寒食早二月杜鵑鳴日暖  
山初綠春寒雨欲晴浴蚕看社日改火待清明更喜瓜  
田好令人憶邵平

賦得秋河曙耿耿云曉望秋高夜微明欲曙河橋成鵲  
已去機罷女應過月上殊開練雲行類動波尋源不可  
到耿耿復如何

潤大歷間人終坊州郾城縣令樂天之外祖也丈夫不  
感恩感恩寧有淚心頭感恩血一滴染天地右張為取



作主客圖





唐詩紀事卷三十九